



InTema Januara - Partnerstvo škole i obitelji

Novu, 2026. godinu na InŠkoli nastavljamo gdje smo i stali s prošlom; govorimo o kvalitetnom školskom životu i ostvarenju zajedničkog cilja – dobrobiti za svako dijete



Naša januarska tema kojoj posvećujemo pažnju, naše tekstove i promišljanja na InŠkoli je **Partnerstvo škole i obitelji**. Jedan od ključnih elemenata dječijeg razvoja i uspjeha jeste dijeljenje zajedničke odgovornosti, međusobna podrška te otvorena i kvalitetna komunikacija između obitelji

i odgojno-obrazovne ustanove.

Značaj takvog odnosa je višestruk i istraživanja pokazuju da djeca, gdje je partnerstvo obitelji i odgojno-obrazovne ustanove kvalitetno, postižu bolje školske rezultate, nezavisno od nacionalne ili vjerske pripadnosti, socio-ekonomskog statusa ili obrazovnog nivoa roditelja; redovnije izvršavaju školske zadatke i domaću zadaću, pokazuju veće samopouzdanje i motivaciju, razvijaju pozitivnije stavove prema školi; a djeca iz različitih kulturoloških sredina posebno profitiraju kada roditelji i nastavnici zajednički prevazilaze kulturološke razlike. Roditelji postaju sigurniji u svoje roditeljske vještine, osjetljiviji na društvene, emocionalne i intelektualne potrebe djece, bolje razumiju nastavne planove i programe te češće pomažu u učenju kod kuće, što dodatno jača njihovu povezanost sa školom. Nastavnici doživljavaju veći poticaj i poštovanje u radu, razvijaju kvalitetniju komunikaciju i odnose sa roditeljima i menadžmentom škole, te bolje razumiju različitost porodica i ograničenja s kojima roditelji raspolažu. Škole koje aktivno uključuju roditelje i zajednicu uživaju veću podršku i bolju reputaciju, a njihovi obrazovni programi postaju kvalitetniji i održiviji, stvarajući time pozitivnu i inkluzivnu školsku kulturu za sve sudionike (UNICEF, 2018).

Krećemo na putovanje na kojem ćemo se posjetiti svih onih važnih komponenti izgradnje kvalitetnog odnosa i partnerstva sa najznačajnijim saputnicima – roditeljima/starateljima. Jedni sa drugima dijeliti ćemo primjere dobrih praksi, ideje i područja u kojima možemo kvalitetno raditi sa obiteljima i poticati međusobno razumijevanje, povjerenje i prihvatanje.

Zato, podijelite sa drugima vaša promišljanja o kvalitetnom partnerstvu, ispričajte nam kako rad sa porodicama i njihovo uključivanje u svakodnevni školski život izgleda u vašoj praksi. Pričajte nam o izazovima sa kojima se suočavate, te načinima na koje ih rješavate. Želimo da čitamo o tome kako za vas izgleda podržavajući, rastući i otvoren odnos sa roditeljima kao ključnim partnerima zdravog, cjelovitog i uspješnog razvoja djece.

Primjeri tema i elemenata partnerstva o kojima možete pisati i dijeliti iskustva u svojoj praksi:

- **Komunikacija:** Kako organizirate redovnu i otvorenu komunikaciju s roditeljima (sastanci, e-mail, telefon, digitalne platforme).
- **Uključivanje u proces učenja:** Na koje načine roditelji mogu pratiti ili podržavati učenje kod kuće, zajedničke projekte ili aktivnosti.
- **Zajednička odgovornost:** Kako zajedno postavljate ciljeve za djecu i pratite njihov napredak.
- **Podrška i rješavanje problema:** Primjeri kako zajednički rješavate izazove, konflikte ili kulturološke razlike.
- **Dijeljenje dobrih praksi:** Aktivnosti koje su uspješno motivirale roditelje da se uključe, kreativni pristupi u radu s porodicama.
- **Jačanje povjerenja i razumijevanja:** Na koji način gradite sigurnu i podržavajuću vezu između škole i porodice.
- **Zajedničke aktivnosti i događaji:** Primjeri radionica, zajedničkih događaja, dana otvorenih vrata ili interaktivnih projekata.

Ideja nam je da na InŠkoli imamo kvalitetnu bazu ideja kako ostvariti i osigurati kvalitetan odnos sa porodicama kroz konkretne ideje, prakse i primjere.

Treba nam vaša pomoć. Čekamo vas!

Aktivnosti se realizuju u okviru projekta Dijalog za budućnost 3 – #DFF3, kojeg provode UNDP Bosnia and Herzegovina, UNICEF Bosna i Hercegovina i UNESCO, u saradnji sa Rezidentnom koordinaticom United Nations in BiH, te u partnerstvu s Predsjedništvom Bosne i Hercegovine i Ministarstvom civilnih poslova Bosne i Hercegovine. Projekt finansira United Nations Peacebuilding (#PBF).

#DFF3 #dijalogzabuducnost3 #dialogueforthefuture3 #PBF #ZajednicaNastavnika

Collections

Partnerstvo škole i obitelji